



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

f Tir Yimiyim

ig tiryimiyim@aolima

yt tir yimiyim

TAPAK 8

Iran: NSC tekolak mapa abentsü
Ahmadian shimogo

ISL: NEUFC head coach asütsü
Juan Pedro Benali shimogo



VOL. XX NO. 220 (ADOK 220) DIMAPUR SANGTENNÜ (TUESDAY)

MONUPII (MAY) 23, 2023

₹ 5.00

NDPP aser BJP-i sorkari Common Minimum Programme yanglutsü

Dimapur, May 22, 2023 (Agencies): Nationalist Democratic Progressive Party (NDPP) aser Bharatiya Janata Party (BJP) indang People's Democratic Alliance (PDA) sorkari Nagaland renloksü atema Common Minimum Programme (CMP) ka adoktsü lemtetogo.

May 19, 2023 nü Guwahati nung senden ka amendang iba lemtet agi.

Senden nung Assam Chief Minister & NEDA Convenor Dr Himanta Biswa Sarma, Nagaland Chief Minister Neiphiu Rio, Deputy Chief Minister Y Patton, Deputy Chief Minister T R Zeliang, Minister Temjen Imna Along aser Minister G Kaito Aye nung aden.

NDPP aser BJP indang Common Minimum Programme yanglutsü atema luden ka tentetogo ta osang angazüker. CMP yangluba sülen

Nagaland lennirtem den North-East Democratic Alliance convenor Sarma dena Union Home Minister den ajurutepa temelaba meshitsü.

May 25 nü Union Home Minister Amit Shah-i Guwahati semdangi arudang NEDA convenor-i pa dang NDPP o BJP indang manifesto tem lemsatepsü.

Election magidang Prime Minister arua osang aika sangoktsütsü sentong liasü saka ibaji meinyaktet. Pai election nung ang aru. Anungji teloktep sorkar indang külem asalentong kar alitsüla. NDPP aser BJP indang manifesto balala lir anungji NEDA Convenor Sarma lenisüba kübok PDA sorkar indang CMP yanglutsü.

May 19 nü senden nung Urban Local Bodies (ULB) election aser tanga onüktem benoka lemsatep.

NLA election nung benokba ken o tem meyipa repringshi

Dimapur, May 22, 2023 (TYO): Nagaland Legislative Assembly indang General Election 2023 mapang ozüing alema inyakba ken o tem benokba meyipa repringshiogo.

May 22, 2023 nü Chief Electoral Officer, Nagaland V. Shashank Shekhar, IAS lenisüba kübok pa indang office nung iba atema senden ka amen.

Senden nung State Police Nodal officer & IG range Limasunep Jamir, Additional CEO R. Khezhe, Joint CEO Awa Lorin, Joint CEO Sharon Longchari, Deputy CEO Alila Chang aser Assistant CEO Toshimeren nung aden.

Election dak sendakba ken o tem meyipa repringshiba dang masü saka election maparen tembanger follow-up action agia

aotsü atema senden ya ayonga amen.

Election Commission of India-i item ken o nung temlung agütsür aser taruba election nung tetsükdaktsü majurutsü atema follow-up action agitsü tuyur.

General Assembly Election 2023 mapang ken o 70 tashi benok aser nisung 81 apu. Ken o balala nung nisung 7 anema chargesheet benokogo aser ken o 61 maneni bushisüngdang südar, ta State Police Nodal officer Limasunep Jamir-i ashi.

District ajaki General Election 2023 mapang benokba ken o tem indang Status of action osang itashia agütsütsü aser ibaji Chief Electoral officer aser Election Commission of India ajanga repringshitsü ta senden nung lemtet.

Assam ajunga nungi AFSPA agientsü: CM Sarma

Guwahati, May 22, 2023 (Agencies): Assam nungi AFSPA agientsü meranger ta Hombarnü Assam Chief Minister Himanta Biswa Sarma-i ashi.

"Taküm November ita tashi nung state ajungalen nungi AFSPA agientsü akok. Assam police nem training agütsütsü atema onoki ex-military personnel anioktsü" ta CM Sarma-i ashi.

Assam kübok district 8 tashi Armed Forces (Special Powers) Act, 1958 (AFSPA) kübok lir. AFSPA agientsüba tashi ya Centre sorkar dak keta lir.

AFSPA agienba ajanga Assam Police Battalions-i Central Armed Police Forces (CAPF) melenzüksü. Ajisüaka ozüingi

nüngdakba ama CAPFs alitsü, ta CM Sarma-i metetdaktsü.

1990 November nungi Assam ya AFSPA kübok "disturbed area" ta sangoktsü aser idang nung jagi ita trok shia AFSPA atsülanga arur.

Assam nung tesüiba küm ana tsüngda law & order tensa tajungba kümogo anungji AFSPA agientsüla ta pai jembia arur.

Yaküm Union Home Minister Amit Shah-ia Assam state nungi yakta AFSPA agientsü ta nangzüka liasü.

"Assam police-i anibelem arema inyakba ajanga state nung yimjung bener aruba atema tenüngsang agütsür" ta Amit Shah-i ashi.

Kaketshirtemi Nagaland sorkar dang tesayurtem anir maotsü mepishir

Dimapur, May 22, 2023 (TYO): Department of Higher and Technical Education-i tawa Assistant Professor kar Mangkolemba o Wakching nung lapoktsü aliba New Model College temi belenba atema Nagaland nung Government Colleges Students' Union 11-i tebilemstü abenba osang metetdaktsüogo.

Kohima College, College; Kohima Science College (A), Jotsoma; Fazl Ali College, Mokochung; Mokochung College for Teachers Education, State College for Teachers Education, Kohima aser Mount Tiya College, Wokha nungi Assistant Professor tem short-term basis (six months) atema mapa belenba lemtet ya meyipa agiang ta kaketshir telok ANGCSU-i sangdong ka nung ashi.

Sorkar college 11 nungi kaketshir teloktemi department dang May 9, 2023 nü HTE/HE/ESTT/8-67/2023 sangdong agütsüba meyipa agitsü, proper channel (NPSC CESE) ajanga mapa adokdaktsütsü aser tesayurtem shimoktsü aser sendaktep alirtem den tamasa asüngdangteptsü atema metetdaktsüogo.

Academic session 2023 tasenba nungi New Education Policy (NEP) kübok Four-Year Undergraduate Programme (FYUGP) tenzüksü aser iba ajanga staff peria maliba college

tem nung timtem ajurutsü ta ANGCSU-isa ashi.

March 24, 2023 nü University-i tetuyuba agütsüba nung taruba academic session 2023 nungi FYUGP NEP tenzüksü shia lir aser iba atema department ajak nung teaching staff talila nüngdaktsü. Ajisüaka department-i sangdong agütsüba ya iba den khenyongi meputep lir, ta parnokisa ashi.

Mapang tatsüka atema dang süka tesayur peria maliba ajanga kaketshirtem akoksatsü. Lapoka aliba college tem nung permanent faculties 12 tashi ita trok atema tangai yokba ajanga kaketshirtem akoksatsü. Iba ya department-i metongjemi inyakba mapa ka lir, ta ANGCSU-isa metetdaktsüogo.

College tasentem lapokba atema tenüngsang agütsür saka kanga dang aritepa tesayurtem aniokba yabo tim masü. Ano tanga college tem nungi tesayurtem anienba ajanga college nung tetsükdaktsü ajurutsü aser tesayur kati college tasen nung department ka

bendanga repringtsüsa akümtsü aser ibaji meshisadangi inyakba mapa ka lir ta parnokisa tebilemstü lemsatep.

MCTE aser SCTE nung Assistant Professor tem ket pei subject nung NET qualification mali aser minimum UGC norms nung aliba ama college nung sayutsü matonger. Anungji parnok attachment basis nung mapa belenba ya inyakyim alema lir, ta ANGCSU-isa sangdong nung shia lir.

Iba sangdong nung Fazl Ali College Students' Union, Kohima Science College Students' Union, Dimapur Govt. College Students' Council, Yingli Govt. College Students' Union, Kohima College Students' Council, Zunheboto Govt. College Students' Union, Phek Govt. College Students' Union, Pfutsero Govt. College Students' Union, Wangkhao Govt. College Students' Union, Mount Tiya College Students' Union aser Peren Govt. College Students' Union mendenpurtemi sign süa lir.

Western Angami Students Union-ia tebilemstü abener

Kohima, May 22, 2023 (TYO): Western Angami Students Union (WASU)-ia Kohima Science College(Autonomous) Jotsoma nungi tesayurtem Model College, Wakching, Mon-i belenba atema tebilemstü abenba metetdaktsüogo.

Sorkari academic year tiyong

nung tesayurtem transfer order agütsüba ajanga kaketshirtem timtem ajurutsü, ta WASU-i sangdong ka nung ashi.

Anungji bangdakpurtemi college ano melapoki alidaki tesayurtem "Attachment" nung transfer asüba meyipa agitsü mepishir, ta WASU-isa ashi.

Imphal nung tensa mejungi aküm; nisung 3 apu

Imphal, May 22, 2023 (Agencies): Manipur yimtiba Imphal nung tensa süngjema aruya lia May 22, 2023 nü lendong mepetmesü adoka ano nisung telok balala tsüngda raratep aser iba mapang media nisungtem dak-a dena teka sangshio.

Imphal East kübok New Checkon area nung nisung kari prangpong amer arur tetsür shishilembartem aser dokan kiburtem amokmerenba ajanga mepetmesü adok.

Iba mapang nisung aika adenshi aser kiojen balala nung mi senoktsüba ajanga tensa mejungi aküm.

Iba osang angashia state aser central forces tesem tonga oa nisungtem azüoka liasü. Iba mapang central forces-i media nisung asem dak teka sangshi.

Iba tatalokba sülen state sorkari curfew mapang meyipa repringshi aser Imphal East district nung nikongdang 1:00 ako aser Imphal West district nung nikongdang 2:00 ako tashi mapang ajema kümtsüogo. Iba ya masüadang anepdang 5:00 ako nungi nikongdang 4:00 ako tashi

curfew salaja liasü.

Manipur sorkar atema advisor on security Kuldeip Singh-i osangbener den jembidang nisungtemi maneni ozüing alema mapa inyaker saka state o central forces-i mapang shitak nung inyakba ajanga azüokteta arur ta ashi.

"Imphal East district kübok New Checkon tesem nung nisung kari prangpong bener dokan kiburtem aser shishilembartem amokmerenba ajanga tensa mejungi aküm saka security forces-i tensa azüokogo" ta Kuldeip Singh-i ashi.

Iba dak sendakba nung nisung 3 puogo aser sepaitemi nüka mitdar, ta paisa ashi.

Tanü anüngdang 12:45 ako meta Bishnupur district kübok Moirang nung lendong ka atalok. Nisung kari gari workshop ka nung mi senoktsü aser state forces o army personnel-i iba mapa inyaker nisung 7 puogo, ta Kuldeip-isa metetdaktsü.

Ano, May 21 aonung 10:30 ako meta Imphal West district kübok Moidangpok nunga mejangjaba nisung kari injang khaloktsüadang nisung 3 yiru. Iba tatalokba atema

state aser central forces-i nisung ka pua lir, ta paisa ashi.

Külen, Chief Minister N. Biren Singh-i Manipur nung alirtem dang telok tenteter ozüing alema mapa meinyaktsü mepishia metetdaktsüogo.

"Ozüing alema inyakba osang na anasa aliba police station mesüra emergency hotline nung sangokjangma" ta paisa ashi.

"New Checkon, Imphal East district tatalokba nung licensed guns ana angu aser ex-MLA ka dena nisung asem puogo" ta CM Biren-isa ashi.

Iba tatalokba nung media personnel dak teka sangshiba atema tebilemstü abener aser tatok meshir, ta paisa metetdaktsü.

Centre sorkari mulunga agizükba sülen central forces indang company 2 Manipur-i arutsü ta paisa shisem.

Manipur sorkari ano anogo pungu atema state nung mobile data aser internet services shibangba osang metetdaktsüogo.

May 26, 2023 nikongdang 3:00 ako tashi Manipur nung mobile data aser internet services maneni shibangtsü ta sorkari ashi.

Tseminyü nung Yuva Utsav sentong ayongzüka agi



Dimapur, Monupii/May 22 (TYO): Ministry of Youth Affairs and Sports, Government of India kübok Nehru Yuva Kendra Sangathan ajanga District Administration aser GHS Tseminyü lungjemer May 22, 2023 nü Town Hall Tseminyü nung Yuva Utsav sentong tuluka ayongzüka liasü, kong MLA Jwenga Seb tetushi tesemdang liasü.

Iba sentong nung jembidang MLA Jwenga Seb-i ashiba agi, Yuva Utsav ya lanur tashi, tejangraba aser sempet benjongba sentong ka lir.

NYKS ya autonomous organization ka lir aser yimdak yimtsüng aser jila aser lanurtem takum yimya aser sempet renlokdahtsüsü nukjidong nung 1972 kum tentet,

Iba ya ajanga nübur tajangzük asoshi sentong balala nung shilem agitsü lanurtem nem sapang agütsür aser

nüburtem terenlok nung shilem agir aser lanurtemi pei sempet sayuteter, ta pai ashi.

"Asenoki India nunger nüchiso ngur kum 75 ajungba Azadi Ka Amrit Mahotsav benjongmung amungdang asen temeden asoshi bendanga agütsür rarartem asenoki bilemtetsüla aser parnok mangdang asangsang kumja Panch Pran of Amrit Kaal agizüksüla," ta pai ashi.

Ibai India asoshi maongka tuluka lir, kong linüki tashi yangertetsü aser tayongzükatem ajangeta tejakleni aoba linük ka kumtetsü, ta ashi.

Asen ato kilonseri India lintük tejakleni aotsü asoshi colonial tangatetba tera samatsü, asen tera nung tejak tentetsü aser telungjem temaba jenjangi ajungkettsü nukjidong yua lir.

Pai ashiba agi, district level nung takok angur temi state

level Yuva Utsav nung shilem agitsü, koba ananü sentong asütsü aser state yimtiba nung August nungi September 2023 tsüngta akatsü renema lir.

State level nung takok angurtemi National level Yuva Utsav nung shilem agitsü, koba Delhi nung 2023 kum October ita tatemlen agitsü.

Iba sentong nung Nancy Semy menden liasü, Rev.Tusaya Kath Suptd, Nagaland State Council of AGEI ajanga sarasadem aser Sole Tep, President Women Club Tseminyü Town ajanga tarur pela agizükba o jembia liasü.

Iba sentong ayongzüka nukjidong Ruokuovikho Chale, Account & Programme Asst., NYKS ajanga rateta ashi, kong declamation contest, cultural fest, painting, poetry aser photo exhibition amala sentongtem agia liasü.

ANGTF lokti senden ayonger

Kohima, Monupii/May 22 (TYO): All Nagaland Graduate Teachers Forum (ANGTF) pur lokti senden ka May 27, 2023 nü CANSSEA Hall, Bayavü, Kohima nung anüngdang 11:00 ako nungi amentsü, ta sangdong ka ajanga ashi.

Iba senden nung SLP (Special Leave Petition) dak sendakba ken o jembitsü, tang koba Supreme Court nung lir.

Iba den ano Graduate Teachers indang Seniority

lemsaba nung Department-i meshidak inyaka tesayurtem tsüngta telemsa adokdaksüba aser lenla balala nung tetsükdaksü ajuruba indanga jembitsü, ta sangdong ajanga ashi.

Anungji Graduate Teachers tem B.Ed aser B.Ed malirtem ajak iba senden nung arua adentsü metetdaksür, ta ANGTF convener Veshosa Keyho aser general secretary Neito Dzuvichu nati sangdong ka nung ashi.

RCS Nagaland ajanga Manipur semdanga teyari oset agütsü



Dimapur, Monupii/May 22 (TYO): Indian Red Cross Society Nagaland (IRCSN) State Branch ajanga May 17, 2023 nü Kangpokpi district headquarter, Manipur nung aliba relief camp tem semdanga liasü.

Iba mapang IRCS Nagaland ajanga azüdokshi mechi relief camp tem nung jenoka aliba nüburtem nem teyari oset agüja liasü.

IRCS Nagaland ya Abeni

TCK, Chairperson, IRCSN aser Akhale V. Khamo, General Secretary, IRCSN nati anir liasü.

Iba mapang parnoki jang, blankets, blankets rugs, thermocol dunlops, soaps, sanitary items, mosquito nets, tarpaulins, clothing, face masks, hygiene kits amala osettem agüja liasü.

IRCS Nagaland ajanga iba mapang camp asem tashi semdanga liasü.

Territorial Army temi Manipur lendong mapang yaritep



Dimapur, Monupii/May 22 (TYO): Ajungben lendong-tsidong mapang yariteptsü asoshi Government of India ajanga 1983 kum amenokba battalion tem rongnung 414 Army Service Corps Battalion Marketing (Territorial Army) ya ka lir.

Iba battalion ya Marketing Division den affiliate süa lir aser Indian Oil indang employee 100 dak tema lir.

Totzü aser gas atsüba/ agitetba tesemtem (POL/LPG/ Aviation) ketdangsütsü asoshi item employee nem Army aser Indian Oil ajanga training agütsür.

Manipur nung azüdokshia lendong atalokba mapang Oil Marketing Company tem nung inyaker tem tensa majungba mechi parnok mapa inyakba tesemi moteti akum mesüra pei aliba tesem nungi ainshitsüsa akum.

Anungji item tesemtem ya mapa inyaker maliba mechi

shibang mesüra nübu meperiba mechi junga mapa meinyaktsüsa akum. Iba yongji Manipur nung tongtipang tesem asem - Imphal Aviation Fueling Station, Malom Bulk Oil Depot aser Sekmai LPG Bottling Plant nung Maj Vijay Bariwal-i anir Territorial Army tem yoka liasü.

Iba mapang battalion nem Oil Installations tem awabanga ketdangsütsü mapa nunglohtsü, kong mapa meinyakteti POL products aser Refuelling of Aircrafts amala tongtipang osettem agi anünga liasü.

Linük tesem balala nungi totuyuba agütsür ghonda 48 tsüngta battalion ya Imphal atong aser parnoki meranga inyakba ajanga ghonda 12 tsüngta Malom Depot nung mapa shidak inyaka totzü abenba gari tem tesem balalai yoka liasü aser ATF tankers tema yokteta civil aser defence indang tayimtsütem nung totzü agüja liasü.

Tanü tashi item depot ya lendong majurudang ama mapa shidak inyaker aser Manipur tesem balala nung aliba petrol pumps, Manipur Police, Army & Assam Rifles unit tem dangi totzü abenba gari tulu 400 dak tema yokogo.

Parnoki kanga junga maparen balala inyakba ngua parnok nem mezüng nunglohtsüba mapa dak nungi tuluba kumdahtsü aser Territorial Army Battalion nem Imphal nungi kilometre 26 pilar Sekmai LPG Bottling Plant indang operation nunga yariteptsü nunglohtsü aser iba tesem nungia anogoshi cylinder 8000-10000 shi belenshir.

Kasa mapang Lt Gen HS Sahi, AVSM, YSM, SM, General Officer Commanding 3 Corps ajanga parnok semdanga 414 ASC Battalion (Territorial Army) ajanga mapa tulu takok ngua inyakba asoshi tenüngsang agüja liasü.

Arunachal nung China-i ali rakzükba majiteter: BJP

Itanagar, Monupii/May 22 (Agencies): Arunachal Pradesh nung China nunger mitkar mesüra civilian temi 1962 nungi tenzüka India nunger litsü rakzükba majiteter, ta state BJP vice-president Tarh Tarak-i ashi.

Tarak-i anir ita pezü tashi Arunachal Pradesh nung aliba Line of Actual Control (LAC) sema 'Seema Yatra' jaja liasü.

BJP lenir ter-i tentetba team ka December 22, 2022 nü Anjaw sector nung Seema Yatra ya tenzük aser taküm April 24 nü Tawang sector nung tembang.

Party lenirtemi mapang shia parnok den külemi item arütsü tesemtem sema jaja liasü.

Osangbener den jembiba mapang Tarak-i ashiba agi, parnoki arütsü sema jajaba mapang LAC nung aliba Army aser Indo-Tibetan Border Police tem den sensaksem aka aser ano arütsü nung aliba yimtsüngtem nungi nüburtem ajurua liasü.

China-i India nunger li rakzükba mesüra tashiyim amshia agiba majiteter ta yimtaklir temi ashi, ta pai ashi.

Saka Chinese People's Liberation Army (PLA) züngsem temi mapang ka-ka India litsüi asaa mesüra memeteti LAC nung long-range patrols aliba mapang ait aser Indian Army temi PLA inyakyimaitü, ta BJP leniri ashi.

December 9, 2022 nü Aranachal Pradesh indang Tawang sector kübok Yangtse nung aliba LAC nung China aser Indian sepaitem raratepba sülen parnoki arütsü sema jajatsü telemtetba agia liasü, ta Tarak-i ashik.

Iba raratepba mapang India aser China nungi sepai kar tera yirua liasü.

"Anogo ishika tsüngta anatsülen nungi sepaitem iba tesem yutsür ao. Iba mesü October 2021 nunga Yangtse anasa atalok aser iba mapang PLA patrolling team tuluka Indian Army temi ghonda ishia pua ayu. Tensa tamajung nung sepaitemi asen arütsü kumzüka ayuba asoshi akum agütsütsü aser tsüngtong oa arütsü repranga tia tejangja metetsü mechi onoki iba sentong ayongzük," ta pai ashi.

"Iba ama arütsü sema jajadang arütsü tenja tejangja meteter aser ano külen central aser state sorkari scheme tem mapa kuma inyakba angur."

September 2, 2020 nung lanur pongu shikari aoba Upper Subansiri district kübok aliba Army patrol zone, Sera-7 nungi PLA temi pua bener ao.

Parnok anogo ishika lir Anjaw district nung chioka liasü.

January 18, 2022 nü lanur ka Upper Siang district kübok Lungta Jor nung arem nungi prangbong agi tui ter pua bener ao aser anogo ter lir chiok.



Ranchi nung tawa renemba Jharkhand High Court noksa nung angur. May 24 nü linük Tir, Droupadi Murmu-i High Court complex tasenba ya semzüksütsü.

Ato kilonseri masü Tiri Parliament building tasenba semzüksütsüla: TMC

Kolkata, May 22 (Agencies): Parliament Building tasenba ya Ato kilonser, Narendra Modi-i masü saka Tir, Droupadi Murmu-i semzüksütsüla, ta Trinamool Congress (TMC) MP, Sougata Roy-i ashi.

Parliament Building tasenba ya May 28 nü semzüksütsü.

Osangbener den jembidang Roy-i, "Tanga party ka nungi MP katia twitter ajanga kasa takhangba agütsüogo. Onokia iba nung ya ai-aura akar. Parliament building tasenba ya Ato kilonser Narendra Modi-i masü saka India Tiri semzüksütsüla," ta ashi.

Parliament Building tasenba atema Ato kilonseri tenüng

tajung aginer, ta Roy-i ashi.

"Parliament ya Lok Sabha aser Rajya Sabha naprongla lir. Ato kilonser ya House nung majority aliba party ka nung lenir. Tir ya Parliament nung kanga tongti lir. Ato kilonser Modi-i Parliament building tasenba atema tenüng tajung aginerba dang. Iba ya sen amajok nung indokba dang liasü, menüngdak liasü," ta TMC lenirisa metetdaksü.

"Iba Building semzüksütsü atema parnok VD Savarkar asoba anogo shim. Savarkar ya tashishitsü aketba lenir ka lir, kechiyong Gandhi (Mahatma Gandhi) tepsetba ken o nung pa apu. Ato kilonser Modi-i alima

dang 'ni iba anogo (Savarkar tasoba anogo) nungji semzüksütsü ta shiner," ta paisa metetdaksü.

Tamalen Congress lenir Rahul Gandhi-ia twitter ajanga, "Tiri parliament house tasenba semzüksütsüla, Ato kilonseri masü!" ta metetdakja liasü.

Parliament Building tasenba nung Lok Sabha chamber nung züngsem 888 mentettsü aser Rajya Sabha chamber nung züngsem 300 mentettsü, ta Lok Sabha Secretariat-i metetdaksüogo.

Külem senden amentsüsa aküm nunga Lok Sabha chamber nungji züngsem 1,280 tashi mentettsü, ta parnokisa metetdaksü.

Temeim sayunüra naro masü saka kakat agüjang: CM Siddaramaiah

New Delhi, May 22 (Agencies): Congress lenir aser Karnataka Chief Minister, Siddaramaiah-i, sentong balala nung nisungtemi naro mesüra sü sempet agütsür, ajisüaka paibo itemji magizüksütsü; temeim sayunüra pa nem kakat dang agüjang, ta ashi.

Siddaramaiah-i twitter ajanga, "Ni naro mesüra sü magizüktetsü lemtetogo, nisungtemi akhüm sayua itemji sempet agütsür. Ibaji nija aser official sentong ajak atema lir," ta ashi.

Temeim aser akhüm sayua nisungtemi kakat sempet agütsütsü akok, ta pai ashi.

"Nenok temeim ni asoshi maneni alitsü ni imlar," ta paisa shisem. Siddaramaiah-isa Bengaluru police dang pa atema

'zero traffic' inyakim agienang, kechiyong nüburtemi timtem ajangshiba pai nguogo, ta shiogo.

"'Zero traffic' tenokdangba ajanga gari lenmang nung senzürtemi timtem ajangshiba meteta ni iba teletetba agiogo," ta pai twitter ajanga metetdaksü.

Tawa Karnataka assembly election nung Congress-i takok anguba sülen Honibarnü Siddaramaiah-i Karnataka Chief Minister tenangzükba agi aser state Congress Tir, DK Shivakumar-i Deputy CM tenangzükba agi.

Arrshi küm 75, Siddaramaiah ya 2013 küm nungi 2018 küm tashi-a Karnataka Chief Minister inyaka liasü. Honibarnü sorkar tasenba tenangzükba agiba

sülen mezüngbuba Cabinet senden nung Congress-i election atema nüboyimba mapang nung nangzükba tenangzükba onük pongu mapa küma inyaksü agizükogo.

Osangbenertem senden ka nung jembidang Siddaramaiah-i, Congress-i tenangzükba pongu mapa küma inyakba ajanga küm shia state senpong nungi sen crore 50,000 shi indoktsü; senotsü tsütsü timtem liaka party-i nangzükba ama inyaksü, ta metetdakja liasü.

Assembly menden 224 aliba state nung Congress-i menden 135 tashi nung takok angu, BJP-i menden 66 dang angu aser taoba mapang Ato kilonser, H D Deve Gowda-i aniba Janata Dal (Secular)-ia menden 19 dang ngua liasü.

Tsüngsang-mopung lendong ajanga India nung nisung lakh 1.3 asü: UN

United Nations, Monupii/ May 22 (Agencies): Tesüiba küm 50 tsüngda (1970 küm nungi 2021 küm tashi) India linük nung tsüngsang-mopung dak sendakba lendong balala, tzümetsüng ama climate change dak sendakba lendong 573 atalok aser item lendong nung nisung 1,38,377 süogo, ta United Nations-i metetdaksü.

Climate change ajanga tarutsü nunga India nung tzümetsüng lendong aser tali atsükba lendong iba dang nungi taliba ataloktsü, ta yaküm Gandhinagar (Gujarat) nung aliba Indian Institute of Technology nungi research agirtemia metetdakja liasü.

Climate change ajanga 'atmosphere' mejungi raksatsüogo aser ibaji ajanga tsüngmok, tsüngi aser tzünglu sashia aruba lendong kanga bulua ataloker.

Bay of Bengal aser Arabian Sea nung cyclone yipru tali kümteter aser yipruji mapang talangka alir, aser ibaji alima tatsükba akümba ajanga lir, ta meteorologist temi metetdaksü.

2022 küm nunga India nung tsüngsang-mopung dak sendakba lendong balala nung nisung 2,227 süogo, ta India Meteorological Department indang 'Annual Statement on Climate of India' report ajanga metetdaksü.

United Nations indang

specialized agency- World Meteorological Department-i, alima nung tzü-mopung lendong balala tatalokba 11,778 nung nisung million 2 dak tema süogo aser iba mapang nungji dollar sen trillion 4.3 jenjang takoksa angu, ta metetdaksü.

Parnokisa, asürtem shilem 90 dak temabo terenlok dak linüktem nungi liasü, ta ashi.

Asia nung tzü-mopung dak sendakba lendong 3,612 atalok aser item lendong nung nisung 9,84,263 asü aser dollar sen trillion 1.4 jenjang takoksa angu.

WMO-i, "1970 küm nungi 2021 küm tsüngda alima nung item lendong balala nung asürtem shilem 47 bo Asia nungi liasü aser nisung teimtiba asübaji cyclone yipru ajanga liasü. 2008 küm cyclone Nargis lendong nung nisung 1,38,366 asü," ta metetdaksü.

Asia nung nisung teimtiba asüba linükji Bangladesh liasü; iba linük nung lendong 281 atalok aser item lendong nung nisung 5,20,758 asü, ta parnokisa metetdaksü.

Africa nunga tzü-mopung dak sendakba lendong 1,839 atalok aser item lendong nung nisung 7,33,585 asü aser item lendong ajanga dollar sen billion 43 jenjang takoksa angu.

Africa nung item lendong nung asürtemji shilem 95 bo tzünglu mapang talangka maruba agi liasü, ta kasa osang ajangasa metetdaksü.



May 22, 2023 nü Port Moresby nung Ato kilonser Narendra Modi aser Papua New Guinea Ato kilonser, James Marape nati Tamil nung nungtuogo kakat 'Thirukkural' Papua New Guinea nung Tok Pisin oshi nung meyipzuka adokba kakat semzüksütsü tangokba noksa nung angur.

Delhi nung nisungi metizüksütsüsa temperature 45 Degree °C jungogo

New Delhi, Monupii/May 22 (Agencies): Delhi nung maximum temperature 45-degree Celsius adenogo aser Najafgarh kiyong nungbo 46.3 degrees Celsius tashi atu, ta Hombarnü India Meteorological Department (IMD)-i metetdaksü.

Met Office ajanga ashiba agi, Amongnü Narela aser Pitampura observatories nung temperatures 45 degrees Celsius liasü, Ayanagar & Ridge nung 44 degrees Celsius aser Palam nung 43.8 degrees Celsius liasü.

Tali atsükba agi Amongnü nikonngang gari lenmang kanga azüngmeyaka liasü.

Ketdangsertemi ashiba agi, anüolen nungi yipru mopung ajanga May 24 nungi tenzuka anogo asem-pezü shi tzünglu tera aruba ajanga tali atsükba süngjemtsüa akok.

Amongnü humidity levels 25% nungi 74 % tashi liasü, ta Met-i metetdaksü.

Taoba Honibarnübo Delhi nung minimum temperature ji 23.2 degrees Celsius aser maximum temperature 40.4 degree Celsius tashi dang liasü, ta IMD-i metetdaksü.



May 22, 2023 nü Chennai nung All India Anna Dravida Munnetra Kazhagam (AIADMK) züngsemtemi Tamil Nadu sorkar anema longkak aيتدang tangokba noksa nung angur.



TIR YIMYIM YIMOBILEM (EDITORIAL)

DIMAPUR SANGTENNÜ, MONUPII (MAY) 23, 2023

Asenokbo shisa dang lemsatepdi

Asenok ajaki asen lima tajung südaktsüner, anungji yimten, lokti aser arogo lenirtem dang nungi tajung imlar. Aji shitak dang. Ajisüaka, asenok dak meshitak jakla ka alibaji asenoki asen lima ajungtsü atema aseni bilemba shisatsü tajung ka lemsateper masü saka asenoki nisungbaji aser par kinji dang tetshia aitsür. Iba jagi alima ajunger masü aser nübertem sünepa alir masü saka tali tamajungba aser meputepba kümdaktsür. Tang asen kidanger Manipur nunga kin o kin na tsüngda meputep adoka Manipur state agi anasemka küma aotsü amai mangtetep aser timtem lendong adokba ya Manipur nung aliba kintem ajak putepa alitsü asoshi shisa tasen ka lemsateptsü melen yimsüsürtemi anir kin kati kin ka majung dang jembia tesempatep adokdaktsüba ajanga atalokba mapa ka lir. Asenok Nagaland nunga mekümdangra, kati ka majung jembia jembia Nagaland nung aliba kintem ya kinunger adianu agi tsükchir akümtsü ana nung dang lir. Asen lima tangar menepa renloka aotsü atema shisa tasen aika nüngdaker, anungji asenok rongnung pei metetba, ajangshiba, anguba aser bilemba shisalen tajung teyutepa lemsatepra, iba jagi nisung dak majung angutsü melen asenok ajungtsü asoshiang shisa (idea) tasen ka angutsü. Asenoki kodang asen tebilemba ka matalokba atema tangar aitsüdir, shitakba nungbo asenokji pa mesüra la kübok kilir akümer. Tetezü, iba nisungba jagi meyarira asenok chiyongtsüa mangutsüba tia nung ali ama asenoksasa asenoki lua bilemer. Tangar limabo gari lenmang kanga junga lir, electric tesangwaa kanga junga arur, tzu tebilemtsü mali, teinyakner atemabo sen makayonga mapa tenzüka inyaktsü atema government-ia yarir aser bank-ia sen aputsür. Item denji asen lima medemdangra asenok meyong tajungbo kecha maka, tezüdangtsüka. Iba ama tensa tia ka nung asenoki kodaser lenmang majungbaji junga kümdaktsütsü, light aser tzu kodaser peria angutsü, mozü ki aser school-tem kodaser tajungba kümdaktsütsü ta shisalemsateptsü melen asenoki tangar dang aija amonger, iba jagi tajungba mekümdaktsüteter. Atangji, alima merenlokbaji aser nübertem asoshi angutsüba ser nung manguba timtemji nisung kari temulung magütsüba mesüra timi meinyakba ajanga lir. Aji bushitsübaaji senso ka temeten aser mapa lir. Ajisüaka, asenok teinyaktsü ka meinyaki asenokbo ayongayonga kidang moka yur tangar majung dang jembia kazüra, iba jagibo asen lima tamajungba tia idaktsütsü. Aji oda, yimten telok o telok nata tejen otsü kakshia kati ka aitsütepa memongi pei lima aser pei nübertem asoshi tajung inyaktsü bilemba shisa tasen aser sentong tajung pei bang nungi adoka nübertem den lemsateptsüla. Tang yabo asenoki asen lima ajungtsü atema shisa tajung lemsateper masü saka kati ka aitsütepba nung mapang talangba endoker. Bilemdangdi süra tangar aitsütsü kechi tasak ali? Ajisüaka, tangar aitsübaaji tatem masü aseni shitakba len (solution) ka sayutettsüla. Ajisüaka, tangari meshitak inyakba dang züngshia aija amongba kisung jagibo tajung ka bentsür arur masü saka tebilemtsüjiang muraloka odaktsür asütsü. Tang yabo asenok ya nüngsen jembir dang amai kümogo, iba jagi asenok rongnung temulung melemtep aser telemsa-ang tali adoker. Ajisüaka, nüngsen jembitsü melen asenoki lenmang tajungba ka indang jembira, tanü aser asüng asen nübertem asoshiibo aji dang nüngdaker, aji dang parnok aotsüba tetsüng milen asütsü. Asenoki tangari aibelenba lenmang metongshija len tasen ka mesayutetra, asenoki tangar majung jembibaji asenoki tangar tenük meremba mapa ka dang asütsü. Joko, asenokbo shirnok majung mesüra shiba tai ta masü saka kechi majung aser kechi tai ta bilemdanga repringtetsü meranga koba tajung aser kechi shitak aji dang jembitsü merangdi. Kati ka aitsütepba agi Nagaland ajungtsü asübo junger lila, saka kati ka aitsütepba jagi tai-ang aika akümer, iba jagi Nagaland tamajungba kümogo. Joko, aitsütepba agi masü saka shisa (idea) tajung lemsatepba agidang Nagaland ajungtsü. Anungji, asenokbo komaser Nagaland ajungtsü ta asüba nung rangloker lenirtemia nübertem den aser nübertemia lenirtem den shisa tajung lemsatep tenzükti.

OLEMSABANG


Tsürabur M. Imtimazung Jamir X-Pastor Kangtsung

Pei taküm zülu (Autobiography) reprint süa adokba 5.5.2023 nung Rev. Jongpong Imsong pastor ajanga East Dimapur Arogo office nung meshiteta sayatsüogo. Pa pei takümsülu otsü kaket nungji pa küm 25 abensar 15th Nov 1923 nung Yisu Yimsü amang. 1927 nung Impur nung tua school azüngtsü tenzüka Foreign Missionary aser tesayurtem aikati sayua kaket shisatsü nung renlok aser class VI renemer aser 1935 - 36 Jorhat nung lua class VII, VIII azüng ta zülua lir.

Iba sülen pei yimti nung Mission school lapok aser Headmaster inyaka alidang, ano 1943 Jan 1st nungi lmti arogo nung pastor inyaktsü Impur Central Council ajanga nungloktsü aser 1951 tashi inyaker sodi agir anen.

School azüngba aser nübur tenzüka wadang nung ajangshiba tatalokba aika jangratemtsü aser tangazüktsü ano tesümangtsü, temenungratsü otsütem aika aremoka züluba taküm otsü nübur ajak asoshi kanga tongtipang ta sangdonger aser ajaki sabua alia azüngtsü ajungshir.

~Publisher Family Mission.



NAGALAND TENÜNG DEN PETA YANGERTSÜLA

~ J. Opang, Dimapur

(Yashi adok nungi...)

Department balala nung post tasen bendenloka lanur nem mapa agütsütsü melen nisung kar retire süra item melena-a magütsüteter aserbo work-charge nung timba, itasenbo mapang shidak nung magütsüteter. Ya Nagaland tenüng mati shilurba.

Nagaland tenüng tajung, Nagaland for Christ kanga junger, Tsüngrema pelaa alitsü, Dry state, No Tobacco Zone, No Smoking Zone kanga junger, saka shirnoki aji azüoktsü tim, parnoki aji mangur. Missionary meyerijang ter yoktsü nangzükba ama missionary temi arogo aser association temi achayanga züngdakja yokba angur, kanga junger. Saka ano tanabena ashir, asen nokdangzüng nung non-local, non-Christian tem ya aseni amangba yimsü dangi anitentsü kota ta bilemer.

Tenla kidang sayutsünger tema langpang nungi political party kar nemja mesüra kar tuketja mejembi tajungba ama bilemer. Kechiyong nai party kar nemjema jembira tanabuba sentepi marutsü. Oda-oda sentep ki azüng-azünga akumtsü aser arogo sensak tia aitsü ta apiteter.

Asenok Aor dangisa meyipty, tatishitsü agi, political settlement ka aita nenok Naga nung president, prime minister shimang ta centre-i ashi nung asen Aortema longjemer Aor rongnungi kabosa tekolakji agitsü ta asütsü asü, lemsateper azü poka anemteptsü mesüra ashioktsüteptsü ta shisabolua bilemetsür. Anungji na, asenok Aor MLA tem, yimlibilema tang nungibo party balala nung liaka marishitepi ka kuma lungjemer alima tejakleni aniangma, yangji Tsüngrem adentsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



Kelingmen Laishir Telungjem (KLT) senden yimdak Monupii 20-21, 2023 anogotem nung temoatsü aser takok manung tembangogo. Iba senden nung tang nungi KLT lenitsü atema Wb. Bendangmatsung Lemtor, Tir aser Wb. Tamsükaba Lemtor Tongti zülur nem inyakyim agi melaba ama sodi agütsü aser 2023 nungi ketdangpur asütsü Kr. Temjenlemla Jamir (Mkg), Tir aser Wb. Wabangtemjen Lemtor (Asso. Pastor Youth, Klm), Tongti zülur asütsü shimtet. Iba sentong mapang agiba noksa ka yangi angur.

Goa nung Arogoi Goa Bench, Bombay HC dang pelaba lemsatep

May 22, 2023: India kübok Goa state nung temaba court-i linük temzüng kübok pei melungba yimsü benshitsü aser pei yimsü tangar den lemsateptsü atema sensotem temeden kümzüka ayutsü, ta oshidang agütsüba atema Goa nung Catholic Arogoi court dang pelaba lemsatep.

Goa Arogo nung otongdar, Barry Cardozo-i, "Iba linük nung senso ajak, talisa Khristantem densema minorities atema iba obendang ya kanga tajung," ta metetdaksü.

May 19 nü Goa Bench, Bombay High Court-i, sensotemi pei yimsü tangartem den lemsateptsü atema linüki iba temeden kümzüka ayutsüla," ta obendang agütsü.

District collector (magistrate)-i Joan Mascarenhas E D'Souza aser la kinüngbu, Dominic D'Souza na dang lar kidang tekülem sentong ayongzüka magitsüla, kechiyong ibaji ajanga yimsü

balala tsüngda tensa raksatsü, ta shia tettuyuba agütsüba anema lai court nung ken o benoka liasü.

India temzüng nung Arrla 19 (1), 25 aser 26 kübok senso ajaki pei melungba yimsü benshitsü aser tangar den lemsateptsü atema senso ajak nem temeden agüja lir, ta court-i metetdaksü.

Putir, Cardozo-i, pei melungba yimsü amangtsü, benshitsü aser tangar den-a lemsateptsü temeden court-i metentsüogo, ta metetdaksü.

December 18, 2022 nü North Goa district collector, Sanjeev Desai-i, Joan Mascarenhas E D'Souza aser la kinüngbu nati Siolim yimdak Five Pillar Church nung tangartem Khristan yimsü dangi meyipdaksür, ta tai tonglokja liasü.

Ajisüaka tenatibo, linük temzüng nung temelaba agüja aliba ama tenati yimsü dak sendakba sentong balala

ayongzüka agir dang, ta ashi.

Lai District Collector tetuyuba anema benokba ken o angadanga sülen Goa Bench nung Justices- Mahesh Sonak aser Valmiki SA Menezes nati akümba bench-i District collector tetuyubaji agentsüogo.

Goa state nung tang BJP sorkar lir, aser parnoki Joan Mascarenhas E D'Souza aser la kinüngbu nati nisung kar kangshia tamangba yimsü meyipdaksüba kuli ka danga magütsütet saka apuani na anema Section 144 benok, ta court-i metetdaksü.

"Item ama tashishiba atema tanga ozüngtem lir, anungji Section 144 benokbaji tim masü," ta court-isa metetdaksü.

Court-isa, apuani jagi Goa nung nisung shinga kangshia mesüra mesüzüka Khristan yimsü dangi memeyipdaksü, ta metetdaksü.

Nütsüng million 1.54 aliba Goa state nung nütsüng shilem 25 shi dang Khristantem lir.

Sudan nung telok kati Tenla kidang Khristantem dak injang khaloktsü

May 22, 2023: Taoba hopta Sudan linük nung prangpong amer telok kati Coptic Arogo nung züngsemtem dak injang khaloktsüba sülen Tenla kidang nungi auyar ajen, ta UK nung amenoka aliba Christian Solidarity Worldwide (CSW)-i metetdaksü.

Taoba Honibarnü Omdurman nung gari ka nung nisung trok aruba sülen Khristantem dak injang khaloktsüba mapang Al-Masalma Coptic Arogo nung putir, Arsenius aser par jabaso na yirutsü aser Tenla ki tanüker kotari agi yirutsü, ta CSW-i metetdaksü.

Par asem yirua nija hospital kati anir aoba sülen tang tajungba lir.

Ano tanga tatalokba ka nung Rapid Support Forces-i Khartoum nung aliba Mary's

Coptic Orthodox Arogo nung putir Elia densema Khristantem ajak Tenla kidang nungi meindok. Sepaitemi Tenla ki den moapuji military base ama amshitsü nukjidong nung Khristantem anema inyak; hopta ka piyong parnoki Arogo amokmerena liasü, ta CSW-i metetdaksü.

May 3 nüa Khartoum North nunga telok kati Coptic Arogo ka amak.

Taoba Amongnü El Geneina, West Darfur nung aliba Al Zareeba mosque ka bomb amshia amak.

Rara ajanga May 12-13 kija nung nisung 280 süogo aser nisung 160 dak tema yirua liasü, ta Preliminary Committee, Sudan Doctor's Trade Union-i metetdaksü.

Sudan nung taküm April 15 nungi tenzüka Sudanese

Armed Forces aser paramilitary Rapid Support Forces tsüngda raraba ajanga yimi aika nung tensa mejungi kümogo.

Iba rara tenzüka sülen nisung 1,000 shi süogo aser meyirjang aika yiruogo. Iba dak alia rara ajanga nisung 200,000-i Sudan toktsür ajenba den külemi nisung 700,000 dak atema linük tesem balala nung jenshiogo.

CSW Tir, Mervyn Thomas-i sangdong ka ajanga linük nung tekülem kitem amakba aitsüogo.

"Metetsümonga yimsü lenirtem amakba, tekülem kitem bomb agi poksatsüba aser military base ama amshitsü atema tekülem kitem amshiba ajanga meimchir temeden anema inyakogo," ta pai metetdaksü.

ANOGO ABEN TSÜNGREM DEN

Alima tasen ka (T.ken 104:31-35)

Kodang Yisu Khrista ne Kümtekdakba aser Tsüngrem ne Tebu lidir, kodang Tanela Temeshi ne dak lidir aser Tsüngrem O i na sayudaktsüdir, teyangluba ajak tebur tajung tasen asütsü aser temoatsü tasen alitsü. Anüng sentsü aser alima sentsü tajungba asütsü. Nai teyanglubaji dangbo mangutsü; nai Teyanglujia angutsü. Aser nai Teyanglurji dang masü; nai Kotaker Tebuji angutsü, shibai na anepalur. "Ni taküm ali tashi Kibuba dang ni ken tenyutsü; kü dak taküm alidang ni Tsüngrem dang ken atentsü. Kü teshisadanga Pa madang taginütsüsa süangma. Ni Kibuba nung pela shishia alitsü" (t.33,34). Ken züluri Tsüngremi yangluba ajak shisadanger iba ken ya zülü. Pai tzütem, tenemtem, ayongnutem aser ayongtem ayimba reprang. Ozütemi süngdong rongnung ken atenba pai angashi. Pai nashi telok rem mejakba angu. Pai nisungtemi totzü aser amtsük yangluba angu. Pai anü adokba aser aiba ajia ali. "Item ajak angur südi?" ta Pai ashi. "Ni iba Teyanglur, shiba Kü Tsüngrem ni PA dang pelaa alitsü."

Temenen ajanga teyangluba ajak timtema alir (Rom 8:22). Saka asen Teyanglur Kibur lir, temenen liaka, Pa teyangluba nung maneni tebur tajung aser rongsen lir. Tsüngremi Pa teyangluba nung pelaa lir ta nai metetter ma? "Kibuba sentsüwangshi teti lidakjang ama ! Kibubai pei mapa nung pelashishia liangma" (t.31). Pai ozütemi ken atenba nung pelar. Pai ayongtem ayimba nung pelar.

Asenokia Pa mapatem nung pelatepdi. Aser tanü asenoki Pa dang tashi angaba agi Pa sentsüwangshidaksür ta pelatepdi.

Pa mapatem ajanga Tsüngrem sentsüwangshir, kechiaser parnok ajanga Pa uluba sayur. Nai teyanglubatem angu dang, Pa uluba angur asü? Pa mapatem Pa pelashishia aliba ama, Pa den Pa mapatem nung pelatepang. "Kibuba teti pelaang. Tanabena ni ashi, pelaang !"

(Fil. 4:4).

America nung DVD Sales temaba jenjang nung 'Jesus Revolution' lir

May 22, 2023: Tan ita ajemdaker yanglu. 1970s mezüngbuba hopta nung 'Jesus Revolution' film ajanga United States nung DVD sales aser Blu-ray-only chart temaba jenjang (No. 1) tongteta liasü; Khristan film ya ajanga Cocaine Bear, Magic Mike's Last Dance, Puss in Boots: The Last Wish and Top Gun: Maverick ajak ajangtet.

Taküm February ita nung Lionsgate-i 'Jesus Revolution' film sayaa liasü. 1970s mapang nung US nung 'Jesus Movement' tatalokba otsü nung ajemdaker iba film yanglu.

Iba film ajanga theaters nung dollar sen million 52 ajangzükogo. Iba film sayaba sülen box office nung No. 3 jenjang tongtet aser hopta aika Top 10 nung liasü aser April ita nung Amazon Prime's best-seller chart nung temaba jenjang atong.

Iba film ya Pastor Greg Laurie-i züluba kakat 'Jesus Revolution' otsü nung

ajemdaker yanglu. 1970s tejaklen Southern California nung tainlonglongpurtem tanela asentenshi milak tenzüka linük tesem ajaklen asentenshi milak jangruba otsü nung ajemdaker iba film yanglu.

Iba mapang nungji Greg Laurie-i Khrista agizüka tekümtet anguba sülen pai Riverside, California nung Harvest Christian Fellowship tenzüka liasü aser tangbo iba Arogo ya America nung Arogo tulutibatem rongnung ka lir.

Iba Arogoi küm 30 tashi SoCal Harvest sentong sponsor asü aser US nung evangelistic sentongtem talangtiba rongnung iba ya densema lir.

'I Can Only Imagine' aser 'American Underdog' film director, Jon Erwin-i Jesus Revolution film ya direct asü.

Iba film nung tongti shilem agirtemji Jonathan Roumie, Joel Courtney, Anna Grace Barlow aser Kimberly Williams-Paisley nung lir.

AO OSHI ANGAZÜKDAK:
TANÜ ANGAZÜKTSÜBA OJANG



Raa

(adv) tangatetba nung akanga nokdakba mesüra jembiba (tough)

* Imkongbai yimten temeten indang kanga **raa** jembi.

Rabalen

(adj) temulung magütsü (inattentive)

* Tanur karibo tesayuri ashiba **rabalen** dang angar.

OLONG PAITEP # 6523

1		2		3		4	5			
				6						7
		8								
9				10		11				
			12					13		
						14				
16						17				

TIPIEN

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S _ _ _ i - (3)
- 9. Nisung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rizüngdak - (3)
- 14. Tebang nung adokba - (3)
- 16. Süngdong tatembangliba - (5)
- 17. Meputep - (5)

LANGTSÜNGLEN

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Majinü - (5)
- 13. Tzüma nung senzüba - (5)

OLONG PAITEP # 6522 TELANGZÜBA


TIPIEN :

- 2. Bangsemo, 6. Tiptem, 8. Jen,
- 9. Talilla, 11. Aren, 12. Tzübo,
- 14. Alia, 16. Angati, 17. Odi,
- 18. Azü, 19. Sünglang.

LANGTSÜNGLEN :

- 1. Yipten, 3. Nüja, 4. Sangro,
- 5. Milen, 7. Tulu, 10. Laza,
- 11. Aben, 12. Tiyong, 13. Ajizük,
- 14. Aitsü, 15. Tasa, 16. Aina.

Agüja aliba noksa nung meputepi aliba 10 bushiang



Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüng :
- 2. Tasoba anogo:
- 3. Küm : 4. Class :
- 5. School :
- 6. Talidak :
- 7. Salem osang :

Tripura BJP-i 2024 Lok Sabha elections atema ayimoktsür

Agartala, May 22, 2023

(Agencies): Tripura Chief Minister Manik Saha-i Hombarnü 2024 Lok Sabha elections atema yimyim ayimoktsüogo.

Tanü Sepahijala district nung Bharatiya Janata Party (BJP) indang 'Karyakarini Baithak' (working committee meeting) amen aser idangji sangküm elections indang onük benoka lemsatep.

Senden nung Chief Minister Saha-i Lok Sabha election aser Prime Minister Narendra Modi-

i küm 9 inyaka aruba onüktem jembiba. BJP-i Tripura state aser linük renloktsü atema tenangzükba agia inyaker aser 2024 elections nung takok angutsü, ta pai ashi.

"Kümshia BJP-i Karyakarini Baithak ayonga amener. Taküm onoki tanga onük kar benoka lemsatepogo. Iba senden nung Lok Sabha election aser Prime Minister Narendra Modi indang küm nung temulung agütsüogo" ta CM Saha-isa metetdaksüi. "Onoki booth tashi itdaksütsü

indang jembi aser BJP-i takok angutsü atema 3328 booths tashi itdaksütsü mapa inyaka arur" ta paisa shisem.

Prime Minister Modi-i beneficiary schemes aser flagship schemes tenzüka kecha masüba nisungtem renlokdaaktsütsü merangba atema pelar, ta Saha-isa ashi.

Iba senden nung taoba Deputy Chief Minister Jishnu Dev Varma, MP Rehati Tripura, Union Minister of State Pratima Bhoumik, cabinet minister tem aser BJP state lennirtem aden.

Assam sorkari Orang National Park atsünga agirtem meindoktsü

Guwahati, May 22, 2023

(Agencies): Assam sorkari Orang National Park nung ali 21,000 bighas atsünga agiba meyipa agitsü.

Deobarnü Assam Chief Minister Himanta Biswa Sarma-i iba onük atema

Forest, police department aser district administration den senden ka

menogo. "Chief Minister-i law-and-order tensa meraksai iba mapa inyaksü shiogo. Ali atsünga agirtem timi meindoktsü atema

department ajak külem senden ka menogo" ta ketdangsür kati ashi.

Orang National Park ya Brahmaputra anüdoklentip tsütsü tzüküm nung lir. Iba

Park ya Assam kübok Darrang aser Sonitpur district nung lir.

Taküm February ita February sorkari Sonitpur district nung aliba Burha Chapori Wildlife Sanctuary nung ali atsünga agirtem meindoka liasü. Iba mapang kibong 2,500 shi ka meindok aser ali 1,892 hectares meyipa agi.

**GOVERNMENT OF NAGALAND
DIRECTORATE OF SCHOOL EDUCATION
NAGALAND : KOHIMA**

NO. ED/AEI-3/2023

Kohima, the 19th May 2023

NOTIFICATION

It is hereby notified for the information of all concerned that New Admissions for Class XI in all the Government Higher Secondary Schools functioning in the State of Nagaland will commence from 25th May 2023 and the following directives are issued for strict compliance.

1. There will be a single Online Admission Portal for all the GHSSs. Students/ Parents shall login into the 'GHSS Admission Portal' through the link given at the department's website <https://education.nagaland.gov.in> and submit applications for schools and streams of their choice.
2. One student can submit application for any number of schools and streams of his/her choice.
3. The portal will be kept open from 25/05/2023 to 31/05/2023 for students/ parents to submit applications. Students will have to upload copies of HSLC Admit Card and Mark Sheet.
4. Students/Parents facing difficulties for using the online facility may take assistance of the Common Service Centres functioning under the Department of Information & Technology. Alternatively, they may download the 'Admission Form' from the portal and submit the duly filled in Forms to the respective schools on or before 31/05/2023.
5. In case of acceptance of forms at schools (Offline mode), the respective schools shall include the details of the candidates to the list of candidates submitted applications through Online mode and process together.
6. Selection of candidates shall be done by the respective schools as per their intake capacity. Guidelines for selection of candidates will be issued by the Department separately.
7. School wise 'List of Selected Candidates' along with 'Waiting List' will be published at the 'GHSS Admission Portal' on 03/06/2023. Details of Admission Fee to be paid will also be made available at the portal.
8. Selected Students shall pay the Admission Fee through online payment mode at the Portal from 03/06/2023 to 05/06/2023. Those facing difficulties for making online payment may pay the Fee at respective schools during the above mentioned period.
9. Allotment of Vacant Seats to candidates from the Waiting List in order of merit will be done on 07/06/2023.
10. Class XI Repeaters need not submit applications. They shall pay the Admission Fee at respective schools on or before 30/05/2023.
11. Submission of applications at the portal does not guarantee admission. Selection of candidates will be done by the respective schools as per their intake capacity in order of merit.
12. Further details will be made available through the admission portal.

Admissions to the following newly activated Government Higher Secondary Schools will be done through Offline Mode Only.

Arts Stream: GHSS, Tobu/Akuluto/Pughoboto/Tening/Ahthibung/Sungro/Sechu Science Stream: GHSS, Kigwema

**(THAVASEELAN K) IAS
Principal Director.**




DIMAPUR GOVERNMENT COLLEGE

ESTD - 1966

NAAC Accredited B+Grade

(AFFILIATED TO NAGALAND UNIVERSITY)



***IMPORTANT DATES:**

Filling up of online forms : 25th May, 2023

Last date of submission of online forms : 30th May, 2023

Date of Entrance Test : 8th June, 2023

Time of Entrance Test

1. Arts	: 09:30 am to 12:30 pm
2. Commerce	: 01:00 pm to 04:00 pm

Venue of Entrance Test : Dimapur Government College

Declaration of 1st Selected List on college website : 12th June, 2023

Admission of Selected students : 13th-17th June, 2023

Declaration of 2nd Selected List : 20th June, 2023
(Based on availability of seats)

FOR DETAILED INFORMATION REFER :
<https://dimapurgovtcollege.in>

ADMISSION 2023 UG PROGRAMME (ARTS & COMMERCE)

COURSES OFFERED

- BACHELOR OF ARTS (B.A.) HONOURS**
 - (i) Economics
 - (ii) Education
 - (iii) English
 - (iv) History
 - (v) Philosophy
 - (vi) Political Science
 - (vii) Sociology
- BACHELOR OF COMMERCE (B.COM.) HONOURS**

** Subject to change from time to time as per guidelines from Nagaland University*

***HELP DESK NUMBERS:**

Monday to Saturday during office hours - 10:00 am - 04:00 pm

* Admission Procedure & Entrance Test

1. ARTS : 9863332524 | 9366127445 | 9366317208


2. COMMERCE : 9366443881

* Technical Support for Online Application : 9366493332

TENÜNGSANG AGÜTSÜR



Sd/-
A. NOKEN TZUDIR
President, MSU



Sd/-
ALEMIENLA
General Secretary, MSU

Ozü kaketshir züngsem CHUBASANGLA LONGCHAR, D/o Imtitoshi & Watimongla, ajanga St. Joseph University nungi M.Sc. (Physics) nung tematiba jenjang ajangteta CGPA 9.28 nung Gold Medal nguteta konang tetushi bener aruba asoshi Molungkimong Students' Union-i tenüngsang agütsür.

Maneni la wadang ajak nung takokba lidakjangma.

Iran: NSC tekolak mapa abentsü Ahmadian shimogo



Tehran, Monupii/May 22 (Agencies): Hombarnü Iran tir-i Ali Shamkhani melena linük Supreme National Security Council secretary mapa abentsü asoshi ketdangsür tasen ka shimogo. Shamkhani ya tawa itangiter dak sendakba ken o ka nung densema alitsü akok ta bilemba sülen tang pa melenogo.

Tir Ebrahim Raisi-i Shamkhani melentsü asoshi tetuyuba ka agütsüogo, shiba ochi mashi ken o nung aija lir aser pa taküm küm tetenzüklen Iran nung linük anema itangiter mapa inyakba atema aletsüta südaktsüba British aser Iran senso bena aliba nisung ka den kanga junga sendaktepa aliba atema tang asdangdar.

Shamkhani ya Iran indang 2015 nuclear deal dak sendakba

den Mahsa Amini asüba ajanga ita aika nüburtemi longkak aita aliba mapang ka nung tang iba temelenshi adokogo.

Shamkhani-i iba mapa küm 10 jungnüa benogo. Lenir Ayatollah Ali Khamenei kübok iba council yagi security dak sendakba ken o ajak achaayanger aser pa ya secretary mapang abener rongnung talangtiba tenzükba nisung masü. Taoba tir Hassan Rouhani-i iba mapa ya küm 15 tashi benogo.

Shamkhani melena Ali Akbar Ahmadian shimogo. Pa ya taoba paramilitary Revolutionary Guard indang strategic centre tekolakba liasü.

Arishi küm 62 tain Ahmadian ya Guard indang navy commander aser Guard indang joint staff tekolakba liasü. Pa linük indang Expediency Council nunga densema lir, shirnoki linük tekolakba nem shisatsü agütsür aser parliament aser Guardian Council na tsüngda mangatettep adokba bentettsür. Guardian Council ya Iran indang constitutional watchdog ama inyaksangshir aser parnoki linük nung election achaayanger.

nung anüolen aliba linük den sensaksem ka-a aruba nung tongtibang nisung ka liasü aser America-i iba tenangzüktepba nungi atsüngintsü atema 2018 küm Donald Trump-i jenjang agiba sülena pai tongtibang shilem agia aruogo.

IRNA news agency sangdong ka ajanga ashiba agi, tetuyuba nung pa kechiba melen iba indang osang tejangja magütsü. Pa melentsü akok ta osang prokshiba mapang ka nung Deobar aonung Shamkhani-i Twitter nung aso 14buba nung Persia nung sangro zülur Mohtasham Kashani-i züluba tekong ka lemsatapa liasü.

Pa melena Revolutionary Guard nung tongtibang nisung ka shimogo. Anüolen aliba linüktemi tenokdangba agütsüba

Wagner tekolakbai June tashinung Russia nem Bakhmut agütsütsü nangzük

Moscow, Monupii/May 22 (Agencies): Russia indang Wagner mercenary group tekolakbai Ukraine indang Bakhmut yimti ya Russian army nem June 1 tashinung agütsütsü nangzük.

Wagner tentetsang Yevgeny Prigozhin-i Bakhmut ya Honibarnü rakzükogo ta ashir, saka Kyiv-ibo tang tashi yimti shilem kar par kübok lir ta ashir.

Ukraine-i par sepaitem Bakhmut tezülen takok nguyonga aor ta ashir.

Saka Prigozhin-i ashiba agi, par sepaitemi iba yimti Russian army nem agütsüba maparen Brehostibarnü tenzüktsü.

"Wagner tem May 25 nungi June 1 tashinung Artemovsk yutsür aotsü," ta Prigozhin-i Telegram nung audio recording ka nung ashi.

Bakhmut dang taoba mapang Artemovsk ta jaa liasü, koba Soviet revolutionary ka nem akum agüja ajaba lir aser Ukraine-i tenüng melenshi.

Pai ashiba agi Wagner temi yimti anüolen tsütsü "defence lines" amenoka lir.

Saka Ukraine indang Deputy Defence Minister Hanna Maliar-ibo par sepaitem yimti telung nung tesem tilaka nung tang tashi lir aser yimti tezülteni takok nguyonga aor ta ashi aser parnok senzüsempogba ajema kumogo, ta ashi.

Lai mapang tatsüka lir Telegram post ka nung Ukraine sepaitemi tang tashi yimti kübok Litak area nung private facility aser private sector kar amokbanga lir ta zülutsü.

Teshisadanger temi Bakhmut ya Moscow asoshi jenjang aketba tajanzükbo masütsü saka iba yimti rakzükba ya Russia asoshi takokba temaitsü ka alitsü, ta ashir, koba Ukraine nung tang tashinung talangtiba raraji iba yimti agütsü asoshi raraba ya alitsü.

Sen yong rarar Wagner temi ita aika iba yimti agütsü temolung agüja arur aser parnoki tanen makai rongsen jenti indoka par sepaitem yokba ajanga Kyiv tashi ajema kumdaktsü amai ajiteter.

Anogo ishika Bakhmut jenjang nung anatsülen nungi sangdongba nung meputepi arur.

Deobarnü Japan nung G7 senden nung jembidang Russia nungeri Bakhmut merakzük, ta Ukraine Tir Volodymyr Zelensky-i nenshia ashi.

Iba yimti rakzükogo ta sangdongba sülen Russia Tir Vladimir Putin-i Wagner nem tenüngsang agütsü. Prigozhin-i par sepai kar den külemi nokdaker Bakhmut rakzükba indang sangdongba video ka social media nung Deobarnü sangdonga liasü.

Iba yimti rakzükba ajanga Prigozhin aser par jurila army tenüng tuogo.

Tang tesüsa sangdong ka nung, "Ministry of defence ket nung nübu peria melira onok ket nung general meyrirjang aika lir," ta Prigozhin-i ashi.

Pai Russia mitkar ketdangsürtem aiben aija aru aser par sepai meyariba atema yimjak nung tenüng asen. Taoba ita parnoki nungdakba injang magütsüra iba yimti nungi par sepaitem ainshitsü ta pai amokmerena liasü.

Bakhmut rakzükba ajanga Russia-i Donetsk region ajanga par küboki aitdaktsütsü nükjidong anasabai bener arutsütsü, koba eastern aser southern Ukraine nung aliba region pezü rongnung ka lir aser koba Russia-i taoba küm September ita referendum agia rakzüka liasü.

Ajüsüaka taoba küm meyi mapang Severodonetsk aser Lysychansk yimtittem agütsü atema Russia-i kanga sashia raradang, Ukraine-i kanga keraa dangalen tesem aika tanaben rakzüka liasü.

Bakhmut asoshi raradang Russian sepai 20,000 dak tema süogo aser 80,000 shi yiruogo, ta ita tetenzüklen US-i shia liasü.

Rara metenzükdang Bakhmut yimti nung nisung 70,000 shi liasü saka tangbo raksar aliba yimti nung meyrirjang ishika dang anünga lir, koba mapang ka metsü aser gypsum atoba aser wine yangluba asoshi nungtugu liasü.

3rd National Armwrestling Championship Nagaland Arm wrestling team-i medal 14 angung



Nagaland Arm Wrestling team nungi takok angurtem medal aser certificate bener tangokba noksa nung angur.

Kohima, Monupii/May 22 (TYO): 3buba National Armwrestling Championship nung Nagaland arm wrestling team-i konang tetushi tulu bener aruja medal 14 nguogo. Iba asayamung ya BCAI (National)-i ayongzuka Karnataka, Bangalore nung May 18 nungi 21 tashi asaya liasü.

Vethozo Lohe, shibai taoba kuma gold medal asem ngua state nem konang tetushi bener arutsüogo, pai taküma youth/senior left/right nung gold medal 4 nguogo.

Asayar, team captain aser coach Neli Dominic-i ashiba agi, takokertem ajak Malaysia nung asayatsü aliba World Championship atema shimogo. Paisa, Nagaland nung iba asaya ya ano kanga buluabo masayar, anungji sorkar mesüra department kechaia

parnok nem teyari magütsür, aser ibayongji tetsükdaktsü adoker, ta ashi.

"Asen state nung iba asaya ya kanga bulua masayar aser arm wrestling ya Olympics nunga züngoksema mali," ta Dominic-i ashiba den team-i shirnok dang nungi teyari meshitsü iba indangjia mejangjai liasü, ta shisem.

Paisa, arm wrestling nung dang masü saka state nung lanur asayar tajung aika lir, ajisüaka teyari peria manguba aser sentotsü agi tetsükdaktsü adokba ajanga asayartem timba kati saisapong nung career yanglutsü makoker, ta ashi.

Sorkar mesüra department kechaia teyari magütsür asünung asayartem ajaki pei senzusenpongtsü aser chijemtsü atema pei sen intoker, kechiyong senotsü

teyari angulen kecha nunga mali, ta pai ashi.

Maneni pai, srokari tarutsü nung Armwrestling ya Olympic nung züngoksemsü aser parnok teyari nung medal timba bener arua Nagaland nem konang tetushi bener arutsütsü imlaba lemsatapa liasü.

Medal angurtem:

1. Neli Dominic - 63 kg senior gold left/right (2 gold)
2. Vethozo Lohe - 78kg youth/senior left/right gold (4 gold)
3. Avilie Zuyie youth - 86 kg right gold left silver
4. Zizi Mongzar youth - 63kg left/right silver (2 silver)
5. Abhishek Pradhan - youth open weight gold
6. Thangboilal Saum - 78 kg juniors left silver
7. Kuvemuri Ringa - 70 kg senior left bronze
8. George Mero - 63 kg juniors left silver.

ISL: NEUFC head coach asütsü Juan Pedro Benali shimogo

Monupii/May 22, 2023 (Agencies): Indian Super League (ISL) club NorthEast United FC puri head coach asütsü Spain nung Juan Pedro Benali shimogo, ta club sangdong ka ajanga Hombarnü metetdaktsü.

Küm 30 shi coach mapa inyakba mapang arishi küm 54 tain Benali-i, Europe, Asia, aser Africa nung team balala coach mapa benogo aser iba den pa Finnish national team indang Technical Assistant liasü.

Pa shimba indang jembiba mapang Benali-i, "NEUFC Head Coach mapa abentsü asoshi maongka agütsüba agizükba ya ni asoshi tetushi tulu lir. Ni kanga pelar aser temaba jenjang nung asayatsü atema team ka yangertsü asoshi merangba mapang club

nung densema inyaktsü yongya atar," ta ashi.

Benali lenisüba nung 2021 küm RS Berkane team African Super Cup final tonga asayaogo aser pa takok tajung ngua aruba nisung ka lir. 2008 küm pa lenisüba nung Vissel Kobe team J-League-i ai aser Japa nung "Best Attack" Award ngua liasü. Pa lenisüba nungsa Sharjah Football Club-i 2003 küm UAE Cup akok aser Morocco club SCC Mohammedia nung inyakba mapang 2001 küm Arab Cup semifinal tonga asaya liasü.

SCC Mohammedia nung takok tajung anguba sülen pa Qatar nung Al-Gharafa Sports Club nung oa den aser pai aniba team tanabuba jenjang nung tembanga liasü. Parnoki iba küm league ya goal difference agi mekoki liasü.

Benali-isa pa career tepeyong academy tem amenokba aser achaayangba nung shilem agia aruogo.

Benali shimba indang jembiba mapang NorthEast United CEO, Mandar Tamhane-i, "Juan club-i pelashishia agizüker. Juan ya coach aser tatician tajung ka dang masü saka pa ket nung continent asem tashi nung inyakba tajangshiba bena lir. Team balala nung shilem agiba ajanga pa indang tactical style renloka aoba sayur aser iba den pai alima nung football asayaba yimya kanga junga meteta lir. Pa lanurtem dena inyakba tajangshiba bena lir aser iba ajanga iba tesem nung aliba lanur asayartem atema lenmang lapoktsütsü asoshi pai teyari agütsütsü," ta ashi.

Inter-District cricket asayamung tenzükogo

Dimapur, Monupii/May 22 (TYO): Inter district cricket asayamung Hombarnü nungi tenzükogo. Iba asayamung ya Nagaland Cricket Stadium aser Sovima Cricket Ground nung asayadaki.

Tanü Nagaland Cricket Stadium nung mezüngbuba asaya defending champions Dimapur aser Zunheboto na asaya aser iba asaya Dimapur team-i wicket 6 agi ayong ayonga koka liasü.

Toss akokba sülen Zunheboto-i mezüng bat asütsü shim aser parnoki over 22.4 nung asayar ajak out ser run 90 dang yangluteta liasü. Zunheboto team nungi Imtizungted Jamir-i run 31, Thejasilie-i run 19 aser Hopito Assumi nungeri dang junga asaya liasü.

Dimapur team bowler tem rongnungi Tahmeed Rahman-i wicket 5 aser Hem Bahadur Chetri o Renben nati wicket anana agia liasü.

Asaya tanabuba shilem nung Dimapur team-i wicket 4 out ser over 12.1 nung run menepa liasü. Dimapur team atema Joshua Ben Ozukum-i run 39 aser Temjentoshi Jamir-i run 27 yanglua liasü.

Asaya nung man of the Match naroküm Dimapur nungi Tahmeed Rahman nem agütsü, shibai over 5.4 nung wicket 5 agi liasü.

Nagaland Cricket Stadium nung tanabuba asaya nung Wokha-i toss akok aser mezüng bat asütsü shim. Parnok rongnungi Nzanthung Mozhui-i run 36, Khyothungo Patton-i 27, Renjamo Y Mozhui-i 21, Nchumbemo Humtsoe-i 39 aser Mhachamo M Mozhui-i run 15 yanglua parnoki run ajak senteper 174 yanglu.

Kohima team bowler tem rongnungi Sepichem aser Michael nati wicket anana aser Khriesavituo, Samuel aser Dagachu nungeri wicket kaka agi.

Run arishiba mapang Kohima team-i kanga meranga asaya ajisüaka run 24 agi memenepi asaya Wokha team-i koka liasü.

Kohima atema Michael Zaputou aser Seyievizo Zaputou nati run 49 aser 36 yanglua liasü.

Wokha team bowler tem rongnungi Renchio Odyuo, Bonthungo Murry, Nchumbemo Kikon aser Mhachamo M Mozhui nungeri wicket kaka

agia liasü.

Iba asaya atema man of the Match naroküm Nchumbemo Humtsoe nem agütsü.

Maneni Sovima Cricket Ground nung mezüngbuba asaya Niuland-i wicket 9 agi Kiphire madak takok ngua liasü.

Toss akokba sülen Kiphire team-i over 24.5 nung asayar ajak out ser run 86 dang yanglutet. Parnok rongnungi Avishek KR Singh-i run 43 aser Bohoto Yeptho-i run 13 yanglua liasü. Niuland team nungi Vino G Zhimomi shiba nem man of the match naroküm agütsü pai over 6 nung wicket 5 agi.

Run arishiba mapang Niuland-i over 8.1 nung Kiphire team-i yanglur aliba run menepa wicket 9 agi asaya akok. Niuland team nungi opener Afzal Hussain-i run 28 aser Vishal Sahani-i run 39 yanglua team jenjang kanga junga kumdaktsü aser parnoki asaya ayong ayonga akok.

SCG nung tangbuba asaya Chumoukedima aser Tuensang na asaya liasü. Mezüng bat asütsü shimba sülen Chumoukedima team-i wicket 4 out ser run 256 yanglua liasü.

Opener Kenezetuo Rio aser Mughavi nati kanga junga asaya tenzuka tenati run 37 aser 31 yanglu aser iba sülen Sedezhalie Rupreo-i out mesüi run 100 yanglua liasü. Maneni captain Imliwati-i run 43 aser Khrievitso Kense-i run 12 yanglu.

Asaya tanabuba shilem nung Chumoukedima bowler temi Tuensang team nungi batsmen tem mapashia out sütsü aser run menepa arishitsü asoshi kecha maongka magütsü. Chumoukedima bowler tem rongnungi Neizekho Rupreo-i wicket 5, Aneizo-i 2 aser Khrievitso Kense o Mainul nati wicket kaka agia liasü. Tuensang team asoshi Thebise-i run 23 aser Royimkiu-i run 16 yanglua tena kijai run ter dak tema yanglua liasü.

Asaya nung man of the match naroküm ya adianu ana; Sedezhalie Rupreo (ball 66 nung 100 not out) aser Neizekho Rupreo (over 4 nung wicket 5) na nem agüja liasü.

Mongolbarnü asaya:

Nagaland Cricket Stadium
8:00 ako: Nuiland vs Mokochung
12:30 ako: Longleng vs Mon Sovima Cricket Ground
8:00 ako: Kiphire vs Phek
12:30 ako: Tuensang vs Peren.

BILEMDANGANG

"Tepela aser tejashi mapang ajakji terenlok asoshi kanga tongtambang."